

和

程

南陽府

隸河南布政司

領州三縣十一

史記秦置三十六郡南陽其一也以地在中國之南而居陽爲名其先屬韓戰國策蘇秦說韓曰北有成臯之固西有商阪之阻東有宛穰九百餘里卽此地矣漢張衡南都賦云武闕關其西桐栢揭其東流滄浪而爲隍廓方城而爲墉湯谷涌其後清水盪其胸推灌引湍三方是通也宋建炎初李綱陳恢復之策力勸高宗居之雖不能用識者躓焉○史記南陽本夏之國夏人政尚忠樸猶有先王遺風又虞夏封呂塋先祖于此有呂城今郡西

三十里之呂村是也○玉海云漢光武始勅南陽  
撰風俗記隋地理志南陽古帝鄉縉紳所出史記  
以秦滅韓徙天下不軌之人於南陽故其俗誇奢  
尚氣力好商賈漁獵藏匿難制又東漢為帝鄉貴  
戚有南陽不可問之謠前後二千石多不易稱職  
王暢成瑨趙戒三人奮勵威猛糾鋤奸豪免中官  
子弟為令長者若干人部內肅然然而召信臣杜  
詩顯尚慈愛人以父母呼之劉寬但用蒲鞭示辱  
教化亦因以大行云○唐韓愈過南陽詩南陽郭  
門外桑下麥青青行子去未已春鳩鳴不停秦商  
邈既遠湖海浩將經孰忍生以感吾其寄餘齡  
隗隗在金陵送鄧民部出守南陽云南陽秦漢郡千  
里屬提封伯業餘雙雉躬耕有卧龍淮源桐栢古  
潭液菊花濃召杜為前後君當何所從

南陽縣附郭

秦宛縣後魏之上陌周之上宛也隋改南陽宛名  
始絕唐末省向城入焉志云向城有二一在府城  
東北臨向渠春秋時許國向邑之人遷此今為村  
聚一在城北六十里魏舊縣也說儲南陽有宛市  
晉石崇言宋定伯賣鬼得錢千五百處○城冢記

云漢清陽縣故城在府城東三里清水之陽後漢書更始立清水上者距三十里爲小長安城光武與甄阜梁丘賜戰敗于此其城周迴一里二百二十步○杜衍故城在縣西南十三里漢杜延年此縣人延年立宣帝以定策功封侯子欽亦知名又南十五里爲蜀漢偏將軍趙雲墓有石碑○武延城在府城北俗呼西城春秋哀元年楚受蔡侯降於此相近有濛縣城俗呼東城盛弘之荊州記云武延城北有白石山山石悉白自遠望之狀若層水積雪耀奕雲日○西鄂城在城北五十里漢張

衡宅在西鄂故城東遺址尚存又西南四里有墓及平子讀書臺唐駱賓王過張平子墓詩西鄂該通理南陽檀德音王卮浮藻麗銅渾積思深○博望城在府東北七里漢張騫封博望侯之食邑也又十里爲雒城秦文公時有陽伯逢兩童子化爲雙雉其雉西飛止陳倉其雌東飛止此故曰雒城又有南鄉城去縣一百里地名沙堰東漢置縣隋析州治於此○水經注云朝水東經朝陽城北北魏地形志朝陽城在朝水之陽也俗呼刁城刁水又東逕雙縣北漢地理志南陽領雙等十二縣是也

縣北湛水所出左傳楚公子格與晉師戰于坂卽此○集古錄云漢圉令碑在南陽縣舊文宣王廟內其字隸書碑石斷裂所可辨讀者天實高惟聖同戲我君媿其蹤體弘化蹈中庸所論歷有休功追景行亦難雙刊金石示萬邦等字○塚宅記云漢宗資宅負郭宗爲南陽名族世居於宛一門仕宦至卿府者三十四人宋時有耕農得一甌瓦頂上有宗氏千秋四字篆文○諸葛草廬在城西南七里卧龍岡上卽孔明所居舊爲祠以奉蒸嘗有道士居住夜聞兵聲懼而移之遂寢按卧龍岡起

自嵩山之南綿亘數百里至此截然而住回旋如燕巢時人曰孔明爲臥龍岡其下平田如掌孔明躬耕之跡猶存唐李白詩赤符起顏運臥龍得孔明當其南陽時隴畝躬自耕卽此處也諸葛井在草廬前青石爲床有汲綆渠百十道數竟不能盡○漢昭烈廟在縣東隱山上相傳昭烈與關張二將隱兵于此○寰宇記云豫山在東北十五里孤峰峭立俗名獨山下有三十六陂漢召信臣東漢杜詩晉杜預皆嘗置堰以溉民田山上有三太守祠集古錄云豫山南葬魏偏將軍黃權

墓前有四碑又十里為紫山一名紫靈山有水出焉冬夏常溫因曰陽谷○南雍州記云梅溪發源紫山南經百里奚故宅百里奚宛人仕秦號五羖大夫有墓在城西七里墓前有七石俗呼七星冢冢左次有碑碑陰刻唐韓賞詩按志以紫山在縣西北三十里後漢末龐士元隱居之所有鳳雛臺遺址○紫山又東北五里曰豐山山海經云豐山有獸其狀如蝮赤喙黃身名曰雍和見則國有大恐又云山有九鐘霜降則鳴下有泉曰清泠泉神耕父處之神來時水亦有光耀南都賦所云耕父

揚光於清泠者也又北十里為瓜里津即辨方志之柴籬矣津上有三梁謂之瓜里渡更始將鄧奉拒光武于此史定伯碑云瓜里津即清水之下流○蕘山在城北二十五里昔居民患蠱毒遇神女于此教以食蕘荷遂愈因名其相連為北筮山○雉衡山在城北七十五里山有石室中甚精潔注水經曰關水歷雉衡山西南逕皇石城西荊州記謂之衡山相傳有名皇石室峰巒重複莫可勝窮所記者鹿鳴武陽亂石拓禽鯉魚五山總曰百重山山上有分水嶺圖經云南水自嶺南流北水自

嶺北流俗呼爲分頭嶺其水爲鴉河乃三鴉之第一鴉也按三鴉路中分二路東北帶西而行者謂之三鴉中有石山鯉魚山拓禽山卽行人來往趨西洛之便路以石川爲第一鴉路口分水嶺第二鴉路口今在汝州界者卽第三鴉矣有飼鴉臺在路中大山側相傳漢光武北趨河朔至此失路得鴉引於馬前飼之因名○丹霞山在城東北一百五十里三鴉路中一名雷山上有棲霞寺寺後一峰巉巖千仞左右兩峰夾立傍近諸峰爭爲向背唐孟郊送芳顏二上人還丹霞山詩松青不肯秋

玉曰不肯柔登山頂正路飲水還直流倩鶴負書信索雲作衣裘仙村莫道遠策杖相交遊

鎮平縣

在府西七十里

漢安衆縣劉崇之封邑也東北三里有安國城史記王陵聚衆南陽以兵屬漢封安國侯卽此○安衆有土魯山出紫石英漢地里志所云也晉改安昌南北朝廢爲穰城縣之北鄉金始置陽管鎮于此後乃陞縣曰鎮平○志云縣西南有菱花池俗名天池廣五里餘中產蓮藕蒲芡之屬又有青龍泉在縣境竹園內流出灌溉甚廣○柳泉出遮山

在縣東三十里巒岫岩堯溝澗深阻相傳王莽兵  
 追光武至此為山所遮竟弗能及因名泉廣凡五  
 丈餘○騎立山在縣西北五十里狀如立騎其山  
 五峰竝峙又名五朶山上有龍湫三穴即趙河之  
 源也南流入鄧州之湍水至新野七里河注于清  
 水○注水經曰湍水又東南逕安衆縣故城南縣  
 本宛之西鄉漢長沙定王子康侯丹之邑也湍水  
 東南流涅水注之涅水又東南逕安衆縣竭而為  
 陂謂之安衆港魏太祖破張繡于是處與荀彧書  
 曰繡逼吾歸師迫我死地蓋於二水之間以為泐

涉之艱阻云○杏花山與騎立山相近其地宜杏  
 故名亦有龍潭淇水所出南流與趙河合去城東  
 十里亦名十里河又縣東四十里之潦河西南自  
 南陽馬峙岬來流經杏花山南至新野縣界注于  
 清水○後漢書宋均安衆人九江太守值虎為暴  
 均至皆渡江去均有墓在南陽東北界安衆故城  
 內墓前有二石獸蹲踞相向狀若羚羊左刻天祿  
 右刻辟邪四字古文左為雷所轟○高士傳宋勝  
 之南陽安衆人少孤家于穀城聚中孝慕甚篤聚  
 中化之少長有禮勝之每行見老人擔負輒以身



代之獵得禽獸常分肉與有親者從兄褒爲東平  
內史遣使召之勝之曰衆人所樂者非勝之願也  
乃去遊太原從郇越牧羊以琴書自娛終其身

唐縣

在府城東南  
百二十里

周地圖記云後魏太和中於漢比陽城內置東荆  
州因西有荊州故此爲東以別之恭帝元年改曰  
淮州以界有淮水爲名隋開皇年改爲顯州以界  
有顯望岡爲名唐武德初改曰泌州以界有泌水  
爲名貞觀始改唐州宋元如之

國朝降縣○按

志唐子山在城南百里縣以是名漢高鳳隱處淮

水在東南二百十里卽禹貢導淮自桐柏者泌水  
源出銅山流經縣北與清水合詩云泌之洋洋可  
以樂餓卽此○輿地紀勝云清德堂在縣治唐李  
適之爲刺史人爲作清德頌宋慶曆間知州頓起  
讀其辭慕其人因建堂重刻此頌○郡國志云比  
陽漢縣在比水之北水北曰陽故名比水出縣東  
北大胡山一名天封山南都賦曰天封大胡列仙  
之隙也漢鮑昱爲比陽長有繫獄當死者母泣訴  
無後昱憐之縱其妻人生子乃殺之後其子仕至  
荊州刺史表聞于朝○漢平氏城在縣東南之平

氏保宣帝時法雄爲平氏長發奸摘伏吏人畏之  
○湖陽城在縣南界光武封長姊湖陽公主于此  
亦古蓼國左傳桓十一年鄭人將與趙絞州蓼伐  
楚師杜預注云蓼國在棘陽縣東南今縣南九十  
里蓼山卽古蓼國地○棘陽漢縣設在棘水之北  
後漢書光武與梁丘賜戰不利退保棘陽者也晉  
省湖陽入焉荊州記云棘陽東北有謝城卽古謝  
國周申伯之都自申遷此詩云申伯番番旣入于  
謝是矣周地圖云湖陽縣光武外祖樊重所居重  
母畏雷爲石室避之悉以文石爲階遺跡尚存○

慈丘城在縣東七十里之中陽山一名慈丘又名  
上介水經云觀水出上介山卽此隋置慈丘縣尋  
廢○志云雙山在縣東北四十五里兩山相對故  
名白玉山在縣南五十里一名髮山上有卓錫泉  
世傳靈濟禪師卓錫其地又五十里爲紫玉山下  
有龍潭○酈道元注水經曰余以延昌四年蒙除  
東荊州刺史州治泚陽縣故城城南有蔡水出南  
磐石山故亦曰磐石川西北流注于泚呂氏春秋  
曰齊令章子與韓魏攻荊荆使唐蔑應之夾泚而  
軍欲視水之淺深荊人射之而莫知也有芻者曰

兵盛則水淺矣章子夜襲之斬蕞於是水之上焉  
泚水又西澳水注之水北出茈丘山東流屈而南  
轉又南入于泚水按山海經云澳水又北入視不  
注泚水余按呂忱字林及難字爾雅並言灤水在  
泚陽脈其川流所會宜是灤水音藥也泚水又西  
南歷長岡月城北舊泚水又會馬仁陂水水出無  
陰北山泉流競湊水積成湖蓋地百頃謂之馬仁  
陂陂水歷其縣下西南竭之以溉田疇公私引列  
水流遂斷故瀆尚存泚水又南逕會口與緒水枝  
津合泚水又南與澧水會澧水源出于桐柏山與  
淮同源而別流西注故亦謂是水爲派水澧水西  
北流逕平氏縣故城東北王莽更名其縣曰平善  
城內有南陽都鄉正衛彈勸碑澧水又西北合澧  
水水出湖陽北山西流北出逕平氏城西北入澧  
水澧水又西注泚水泚水自下亦通謂之爲派水  
昔漢光武破甄阜梁丘賜於泚水西斬之於斯水  
也泚水又南趙澧二渠出焉泚水又西南流謝水  
注之水出謝城北二源微小至城漸大城周迴水  
側世祖建武十三年封樊重少子丹爲謝陽侯國  
高岸下深浚流徐平時人目之爲渟澧水城城之

西舊棘陽縣治故亦謂之棘陽城也泚水又西南與長坂門二水合其水東北出湖陽東隆山山之西側有澠日南太守胡著碑子珮騎都尉尚湖陽長公主卽光武之伯姊也廟堂皆以青石爲階陛廟北有石堂珮之玄孫桂陽太守瑒以延熹四年遭母憂於墓次立石祠勒銘于梁石宇傾頽而梁字無毀盛弘之以爲樊重之母畏雷室蓋傳疑之謬也隆山南有一小山山坂有兩石虎相對夾隧道雖處蠻荒全無破碎世人因謂之石虎山其水西南流逕湖陽縣故城南地里志曰故蓼園也竹書紀年楚共王會宋平公于湖陽卽此東城中有二碑似是樊重碑悉載故吏人名司馬彪曰仲山甫封於樊因氏國重能治田殖至三百頃廣起廬舍高樓連閣陂渠灌注竹木成林六畜放牧魚羸梨菓檀棘桑麻閉門成市兵弩器械資至百萬富擬封君世祖年少數歸外氏及之長安受業齋送甚至世祖卽位進爵敬侯詔湖陽爲重立廟置吏奉祠章陵常幸重墓其水四周溉城東有有若令樊萌中常侍樊安碑城南有數碑無字又有石廟數間依于墓側棟宇崩毀惟石壁而已其水南入

太湖湖陽之名縣藉茲而納稱也湖水西南流與湖陽諸陂散水合謂之板橋水又西南與醴渠合又有趙渠注之二水上承派水南逕新都縣故城東兩瀆雙引與南長水會水上承唐子鄉諸陂散流謂之唐子陂陂上有唐子亭漢光武自新野屠唐子鄉殺湖陽尉于是地陂水清深光武以爲神淵矣唐子陂西南流與板橋水合又西南注于泚水又西南流注于清水也

泌陽縣

在府城東二百三十里

漢舞陰縣地有故城在其北東魏改臨舞縣及置

期城郡于此隋郡廢縣存唐天寶年改泌陽以在泌水之陽而名○周地圖記云後魏之上馬縣也縣南有石馬本名石馬縣後人訛爲上馬唐初尚沿此名○志云銅山在縣東四十里其地有分水處東流爲淮西流爲泌同源異流相傳漢鄧通鼓鑄其上水經注曰泌陽雞翅山九渡水所出溪澗縈委泂河九曲其猶零陵之九渡也○盤石山在縣南四十里上有盤古廟按水經注謂之盤石山蔡水出焉西北流注于泚或後人訛爲盤古耳○其盤山在縣東北八十里上有石碁盤與截軍山

竝峙又十里爲關索城舊傳關索所築因名○地圖記云藍鄉在泌陽縣界漢光武兄劉縯敗王莽前隊大夫甄阜屬正梁丘賜盡獲其輜重于此

桐柏縣

在府城東南二百里

漢復陽縣隋改今名○縣南有方石高丈許銘曰春山凝眸春水悠悠乃命成侯視此清流宋慶曆四年立俗謂之曲水臺○按志桐柏山在縣東南一里其山東接隨州界西接棗陽界峰巒竒秀上有玉女臥龍紫霄翠微蓮花諸峰淮水出其下近山又有大木山晉祖逖將家屬避難于此○水經

注云桐柏山南有淮源廟廟前有碑是南陽郭苞立又二碑竝是漢延熹中守令所造舊有淮濱令掌此祠唐天寶中封淮濱爲長源公廟中有石龜十二枚極大○集古錄載漢碑畧云延禧六年正月八日乙酉南陽太守中山張君處正好禮尊敬神祀以淮出平氏始於大復潛行地中見於陽口立廟桐柏春秋崇奉云云○志云胎簪山在縣西北三十里禹貢淮水發源胎簪卽此又名大復山漢書桐柏大復淮水所出也又三十里爲牡丹山上多產牡丹故名又十里爲石柱山上有石柱柱

有鐵環莫知其故又北二十里爲高老山一名高  
樂山峰巒峻起高與峯山相連爲石門山兩山對  
峙如門故名元好問詩兩崖懸絕倚山濱草徑低  
迷劣可分潭影乍從明處見竹香偏向靜中聞石  
林萬古不知暑茅屋四隣惟有雲曳杖行歌羨樵  
叟此生何計得隨君

南召縣

在府城北  
百四十里

國朝成化間析置以地有南召店爲名世傳卽楚  
王之故城也○統志云鹿鳴山在縣北三里世傳  
光武至此聞鹿鳴故名○金葬山在縣西五里峰

林秀麗古多王侯葬此○天子望山在西南二十  
里耆老云昔光武失路羣鴉導之而出因登此山  
以望南陽也空山在縣西十五里上有石洞深邃  
莫測相傳嚴子陵居焉亦名子陵洞○丹霞山在  
西北四十里一名畱山上有棲霞寺寺外一峰巉  
巖千仞兩峰壁立色頽如霞○堞石穴在東北四  
十里世傳漢陳琳槩刀于此石隙尚存○東岐州  
城在郡北界之石碑保卽南召故城也又十里有  
北召廢城

鄧州

在府城西南  
百二十里

領縣三

周申伯國平王母后家也春秋鄧侯封邑故漢置鄧縣焉秦封魏冉爲穰侯於此有穰侯廟在城南冉死葬陶江卽張城也統志云州東門上有秦武安君白起廟起嘗拔鄧取宛後人祀之州南門外有布鼓臺相傳光武微時擊之有聲因築臺于此又有太尉臺在三公城上蓋鄧禹爲漢太尉後歸故里鄉人飲餞於是因以名之○志云百花洲在州城南宋仁宗時張士遜以鄧國公致仕還第與范仲淹遊詠其上仲淹有漁家傲詞五首以紀之蓋文正公嘗知是州也仲淹又有嘉賞亭春風閣

在州治內黃庭堅集有嘉賞亭詩卽此文正公集有春風堂下紅香滿之句故以此名其閣也宋淳化初蘇易簡至道初寇準俱來治此州易簡愛竹有題西禪院碧鮮亭詩寇萊公守郡俸祿悉以施予後人追思荆萊公堂堂下有池蒲葦繁密故韓駒子蒼詩有丞相堂下蒲蓮稠之句○州城上曰覽秀亭漸佳樓謝絳爲守日所荆也范仲淹黃魯直俱有詩絳後家于城西之五隴山出有五堆連接諸謝墳墓在焉梅堯臣詩窮覽川原勝經行未見頻樵爨但聞斧谷暖自留春○紫金山在州西



南岡良嘯起因為城角崖下洞二宋狀元賈黯讀  
 書其中後有道士居之築藥圃於洞門南雍記云  
 紫金山下石橋水汚而為池出靈龜色如金縷又  
 有九井汲一井八者俱震又城南福勝寺之東北  
 隅有塔十三層高八丈中有一井俗呼為海眼云  
 ○鉗盧陂在州南六十里漢置州之陂堰此為最  
 大灌田萬餘頃故老相傳萬頃鉗盧殆不虛也又  
 有楚堰在西北六十里○析隈山在州南七十里  
 左傳僖二十五年秦人過析隈因記其地而名山  
 矣禹山在西南九十里此山祈雨有應因名兩山

後人訛為禹山湯山在州西七十里山有兩峰東  
 西列峙峰頂有成湯廟故名○覆釜山在西北八  
 十里以形似名俗呼吐霧山有香巖寺在西北之  
 白崖山寺兩禪院乃唐一行與虎茵二師所開一  
 行在長安歸寂肅宗歸而葬之葬後山中香風一  
 月不息乃名其寺曰香巖○城邑攷云穰東故城  
 在州東南二里穰漢縣戰國時楚之別邑也○魏  
 武帝城在西南五里曹魏攻張繡所築水經注云  
 湍水又逕魏武故城西南即此○荊州圖副云湍  
 水作湍在城北七里有六門堰擁湍水而成白水

濁水棘水滴水之所聚矣亦召信臣所作也臨湍城在西北六十里西魏置縣于此湍水南側有王思正墓題云北齊蜀郡太守王子雅南陽西鄂人近墓有雙石樓銘○涅陽城在州東六十里應劭曰在涅水之陽也漢武帝封路最為侯國王莽之前亭矣縣南有二碑其字紊滅不可復識或云是左伯哀碑晉語陽秋宗少文涅陽人善圖書琴畫精於名理每遊山水輒忘歸後作一圖彈琴使衆山皆響○冠軍城在州界內冠軍漢縣城東北隅有霍去病墓西北隅有竇憲墓蓋竇霍之封邑也塚記云張詹墓在冠軍故城西有碑刻其背文曰白楸之棺易朽之裳銅鐵不人凡器不藏嗟爾後人幸勿我傷宋元嘉為盜所發獲金銀器甚多鄺道元云塚不甚高而內極寬大虛設白楸之言空負黃金之實雖意固南山寧同壽乎

內鄉縣

在州城西北百二十里

郭仲產南雍州記云析水即水經之洧水也出析縣北南入于洧謂之洧口又云丹水合洧水按漢析縣楚白羽之地秦昭王發兵出武關攻楚取析是矣秦既得楚以為中鄉後至隋避諱改內鄉○

志云舊縣城周迴七里許楚平王遷許于浙實白  
羽卽此也金始移今所宋徽宗御製八行碑存○  
三戶城在縣西南諺謂楚雖三戶亾秦必楚者也  
范蠡三戶人卒後祀之甚嚴○羅王城春秋桓十  
三年楚人伐羅卽此漢王城城內有試劍池商於  
城在於城保秦張儀許楚商於之地卽此丹水城  
在縣西南郡國志云卽楚商密地漢縣也各去今  
縣百餘里○順陽城在縣界之順陽保漢博山縣  
後漢明帝改曰順陽矣桓帝時劉陶爲順陽長縣  
多姦猾陶覆按姦軌所發若神以病免吏民思而  
歌之曰邑然不樂思我劉君何得復來安此下民  
□統志云馬尾鎮在順陽保北卽秦漢沮陽故城  
後魏置以拒齊齊陳顯達攻圍不下乃此城也水  
經注曰均水南逕順陽縣西後漢建初四年封馬  
康爲侯國□玉照崖在順陽保自丹水行謂之小  
江口北有石崖高數仞許截然如削其色清瑩下  
有潭水色亦漣漪宋順陽尉郭端來遊名爲玉照  
○水經曰湍水出酈縣北芬山南流過其縣東攷  
漢書地理志有酈縣故城在今縣東隋爲菊潭縣  
今有南酈北酈二城菊潭源出析谷東石澗山或

云石馬峰其水傍生甘菊極馨有數十家惟飲此  
水壽至百歲之上酈道元云漢司空王暢太傅袁  
隗太尉胡廣並汲飲此水以自綏養是以君子留  
心甘其臭尚焉○志云縣西南白崖山有水簾洞  
水自洞下若垂簾然世傳鬼谷子修道處有清泉  
在縣西之白亭保水色甚清中產綠龜上有龍祠  
旱禱輒應○熊耳山在縣東十二里連河南府盧  
氏縣界漢地里志弘農有析縣後始改屬南陽又  
十三里爲蕭山因祀光武得名蓋世祖始封蕭云  
○馬戶山在縣南山有穴相傳昔有神馬出焉石

勒時立黃攀神祠于上因號胡保山○靈山在縣  
南二十里其上松柏鬱森禽鳥喧集最爲靈異又  
香爐山在靈山之東上有神祠舊有一香鼎範金  
所成而漆其外刻云左七里右七里黃金只在七  
七里人皆莫曉至元時內臣見之而悟携去○高  
前山在東南五十里亦名天池山其上有水甚寒  
而冽比于帝臺之漿飲之者已心痛○石堂山在  
縣西五十里洞然若堂又名靈堂麻衣子修道處  
○墨山在縣北五十里山色盡黑一名玄山仙聖  
所宅南有丹崖映川流之渚壁峙霞降江雲空秀

二岫亭亭更為特出矣又北九十里有山曰秋林  
 夏館泉石佳麗元好問詩秋林夏館山水窟家家  
 林影映湖光○兼隱亭在縣治內宋邵雍詩兼隱  
 詫來書于時特起予民淳無訟聽縣僻類山居簿  
 領杯盤外官聯談笑餘不知當此際傍邑更誰如  
 ○半山亭在縣北湯河丰山之間宋浮休居士張  
 舜民窪樽石刻在焉元好問有滿江紅詞江上窪  
 尊人道有浮休遺跡尊俎地江山如畫百年岑寂  
 白鶴重來城郭在山花山鳥渾相識任與君載酒  
 半山亭追疇昔

新野縣

在州城東南七十里

水經注云棘水南經新野而歷黃郵聚即此後魏  
 典略孝文帝南巡至新野臨潭水而見菖蒲乃歌  
 曰兩菖蒲新野樂遂建兩菖蒲寺以美之○志云  
 縣東北有彈子池相傳光武彈蛙此池至今不鳴  
 治內有議事堂蜀志劉先主屯新野與徐庶議訪  
 諸葛孔明于隆中○涪水在縣百十里許南入漢水  
 縣北有泚河縣西有湍河東南有棘河西北有刁  
 河各注之○水經注曰泚水又西南逕新都縣故  
 城西王莽更之曰新林郡國志以為新野之東鄉

故新都也○乾明寺在縣西四十里東漢陰皇后  
 故宅後建為寺○漢書列傳注鄧禹新人有宅在  
 南陽界雍州記云禹與鄧晨宅隔一陂雖垣墻已  
 平基塹可識晨宅有大樹晨每依陰于其下稍北  
 即蔓荆山其山多產蔓荆故名○望夫石在縣北  
 二十五里白河岍世傳一嬪人送夫從戎至此而  
 別其後嬪望夫佇立忘歸乃化為石唐劉禹錫詩  
 終白望夫夫不歸化為孤石苦相思望來已是幾  
 千載只似當時初望時○寰宇記載曹景宗讀史  
 至司馬穰苴樂毅傳撫卷歎曰大丈夫當如是仕  
 梁為右衛將軍庾肩吾字慎之其子信字子山文  
 竝綺麗見稱當時已上俱新野人○後漢書建初  
 間魯丕為新野令視事一年考課第一又載孔仲  
 山家貧奉親變姓名傭為新野縣街卒荊州刺史  
 范巨卿行部縣選仲山為導騎巨卿見之驚捉臂  
 曰子非孔仲山耶吾昔與子曳裾游太學吾蒙國  
 恩致位牧伯而子懷道隱身自處于此仲山曰侯  
 嬴甘心於賤業晨門肆志於抱關豈為鄙哉巨卿  
 敕縣代仲山仲山竟不肯去

浙川縣 在州城西北  
 百二十里

唐武德初析內鄉置取後魏浙州之名司空圖寓  
浙上詩華下支離已隔河又來此地避干戈山田  
漸廣獫狁到村舍新添燕亦多丹桂石壇宜竝長  
秦雲楚雨暗相和兒童粟熟迷新徑歸去仍隨牧  
豎歌○志云浙水在西南三十里源自商州流經  
縣南與丹水合注水經云均水出浙縣北山南流  
過其縣東合丹水丹水在縣北十五里抱朴子以  
水有丹魚先夏至十日伺之魚皆浮水赤光如火  
網而取之割其血塗足可以步行水上卽此水也  
縣東南有太白山峰巒高峻下臨丹水舊指此山  
爲浙川順陽二縣界○大黃山小黃山俱在縣西  
石杯山在縣南有隋石杯太子廟○白崖山在東  
南百里石色瑩白如縞上有禪寺范仲淹詩白崖  
山下古禪刹卽此○峯嶺山在縣北二百里其山  
甚高峭壁如削爲唐忠國師結茅處持葷穢至雷  
雨輒發不得近

裕州

在府城東北  
百二十里

領縣二

堵陽城在州東六里漢縣俗呼堵陽堆水經云堵  
水出堵陽縣北山數源竝發南流經小堵鄉謂之  
堵水張釋之墓在州城西有漢石碣釋之堵陽人

○襄邑城在州南二里西魏所置郡也方城山在東北四十里左傳僖四年楚屈完對齊桓公曰楚國方城以爲城卽此矣隋初襄邑郡廢乃置縣爲方城至金始立裕州方城其所治也 國朝省入

按唐書貞觀初年太宗封叔祖神符爲襄邑王治順陽則襄邑郡未嘗廢也或隋廢而唐旋復亦未可知順陽漢縣故城在州北與內鄉界○志云美哉亭心遠亭俱舊方城縣治宋陳與義有詩○漢王臺在州東南之松陂保相傳高祖所築有子房廟在東南之房山相傳子房遊息之所又補正

卽黃石山黃石子房之師也其後葛仙翁飛昇于此有昇仙關存按志黃石山在東北四十里出研石最佳詳研譜○七峰山在州北三十里有七峰竝列而名又十里爲泉白山與七峰對峙山頂有泉下流如布相連爲當陽山本草滑石出當陽卽此○潘河在州城東發源當陽山下南流入趙河州西三里有三里河源出分水嶺又三十里有大河源出羅漢山俱東南流注之○聖井在州東其地四面皆下井居其上獨高併餘泉常仰溢暖泉有二一在歷山一在七峰山三時俱涼至冬則暖



按裕州相傳有八景劉禹錫題方城八景詩一曰  
松陂烟雨在松陂堰每晨夕望如烟雨故名詩云  
堤上槎牙幾箇竹汪洋陂水映遙空望來烟雨連  
青嶂疑是當年杖化龍其二曰大乘夕照在州東  
南大乘山每夕有光照於山巔如日出然詩云山  
勢巍峩翠作圍樓臺金碧影相輝老僧把鉢歸來  
後猶對斜陽補衲衣其三曰蓮塘夜月在通仙觀  
後昔人云陰夜見月于水中後人沒水求之得一  
寶鏡而去月不復見水亦隨涸詩云花嬌欲語水  
縈紆添得嫦娥色更殊午夜老龍因睡覺幾迴錯  
認是明珠其四曰鍊真春暮卽鍊真宮也在州北  
一里漢湖陽公主所築詩云風擺殘花點藥爐東  
君無計可支吾道人日誦黃庭罷曳杖松林看鶴  
雛其五曰仙翁雪霽在黃石山冬雪之時其頂獨  
震詩云觀宇巍峩紫翠間葛公從此煉丹還六花  
舞罷難尋處樹木粧成玉笋斑其六曰落川雲望  
卽落甲川也在州西北十五里詩云一川渺渺逝  
如斯上有浮雲接水涯蒼狗白衣從變態令人望  
處起親思其七曰羅漢晴嵐卽羅漢山也在州西  
三十里舊名羅蠻山詩云山堆螺髻插春旻羅漢

知誰爲立名一抔嵐光堪羨處恍如足練曬新晴  
其八曰堵陽釣磯在堵陽陂之西渚相傳爲嚴子  
陵釣處詩云一片臨流氣勢雄垂楊相蔭水溶溶  
子陵已矣無人釣分付蒼苔碧蘚封

舞陽縣

在州城東北  
百四十里

戰國策蘇秦說魏王曰大王之地南有許鄆舞陽  
按志舞水泉在縣東南三里河南岍泉湧躍若舞  
舞陽之名取此漢樊噲所封邑也後漢吳廣晉司  
馬宣王亦俱封舞陽侯○按志縣北五十里有樊  
噲陵其地名樊村 國朝嘉靖間居民郭詢曾掘

發噲陵取其藏器被法誅○蓮花池在縣北有東

西二池卽隋北舞縣故址今爲鎮○鄼侯廟在縣

西祀漢相國蕭何以何始封南陽卽此地○箕山

在縣南三十五里馬鞍山在西南四十里俱以形

似而名十八盤山在南八十里周迴一十八里○

滾河源出蘇山東流逕汝南界達于淮○沙河源

自魯山縣吳大嶺來流經縣界東會澧水達于黃

河寰宇記以方城衡山澧水所出卽桐柏之連岡

矣○楚王墓在縣北灰河保吳桓平王墓拋屍于

水卽此地也○秋青湖在縣北四十里周迴十里

相傳狄青飲馬于此○水經注云陂水東逕無陽縣故城又東逕定陵南與芹溝合其水導源葉縣東南流注于澧往復昆澧之內纏絡四縣之區疑卽呂忱所謂沮水也

葉縣 在州城北百四十里

古應侯國周之應鄉矣左傳曰邗晉應韓文之昭也春秋屬楚成十五年遷許于葉卽此楚白公之亂葉公帥國人攻之白公奔山而縊葉公遂老于是邑焉葉公好龍有翫龍臺在縣南卽其畫龍之所唐王維有詩近有墨池俗傳右丞泚筆池也漢

王喬爲葉令每朔望自縣詣朝章帝怪之密令太史伺望言其臨至輒有雙鳧從東南來舉羅得雙鳴鳧詔尚方診視則所賜尚書官屬履也每當朝時葉門下鼓不擊自鳴聞于京師按唐開元中析置仙州及仙鳧縣俱以是名宋歐陽脩次葉縣詩朝渡汝河流暮宿楚山曲城陰日下寒埜氣春深綠征車倦長道故國有喬木行行漸樂郊東風滿平陸蘇軾題雙鳧觀詩王喬古仙子時出觀人寰嘗爲漢郎吏猷世去無還雙鳧偶示戲于以警惰頑不然神仙跡羅網焉能攀○志云荆山在縣北

十里平地中略有岡阜又稍西爲河山古卞城在  
焉後魏書此地有河山縣負山臨水卽其處矣今  
河山保是○黃成山或云卽方城山在縣西三十  
里一名苦菜山一名長城山乃長沮桀溺耕處下  
有東流水卽子路所問津也○青山在縣西南六  
十里一名西唐山注水經云澧水東過西唐山是  
矣○昆陽城在縣南漢縣光武帝斬王莽將王尋  
于此後漢書光武破王邑會大風雷屋瓦皆飛雨  
下如澎淪水盛溢士卒溺死以萬數水爲不流按  
蘇軾有弔昆陽賦益指此○蒲王城在縣東北之

蒲城保舊傳北齊蒲洪所築汝濱城在縣北十五  
里北齊置汝濱縣及漢廣郡者唐祖詠汝濱別墅  
詩失路農爲業移家到汝濱獨愁常廢卷多病久  
離羣鳥雀垂窓柳虹霓出澗雲山中無外事樵唱  
有誰聞○沈諸梁廟在縣南卽春秋沈諸梁邑也  
唐李百藥詩總轡臨秋原登城望寒日烟霞共掩  
映林野俱蕭瑟楚塞鬱不窮吳山高漸出客行殊  
未已沐浴期終吉椒桂奠芳樽風雲下虛室館宇  
肅而靜神心且康逸伊我非尊寵勿驚疲朽質○  
諸葛墳墟在縣北平山下有一斷石幢云此地有

諸葛之舊墳墟今山麓西有諸葛廟東有金雞塚  
疑卽孔明先世葬此蓋孔明瑯琊人避地而西自  
其祖父已然非獨孔明在南陽也此幢乃隋文帝  
開皇二年物去三國未甚遠必得其真○宋梅詢  
墓在城南二十五里梅灣相近有任楠墓亦宋人  
已上二墓近日俱爲盜所發楠志石見存詢已失  
矣神宗之時黃庭堅調葉縣尉嘗作漫尉詩○李  
奉先葉縣人天性至孝父卒旣葬竊自嘆曰奉先  
兒時父嘗戒家人曰兒幼勿令獨入林野慮其驚  
恐今親沒一日棄于林野吾心惻然安所忍乎乃  
結庵于墓側晝夜臨哭其中植樹數百株時呼爲  
孝子林○陳與義字去非葉縣人宋徽宗見其所  
賦墨梅詩喜之遂登册府南渡建炎中掌內外制  
叅知政事有簡齋集行于世

汝寧府

隸河南布政使司

領州二縣十二

春秋沈蔡二國地後併于蔡故後周于此置蔡州也漢置有汝南郡故元因之曰汝寧路也劉宋立司州於此命其城曰懸瓠城以汝水屈曲如垂瓠然圖經云其水洄曲其地平舒面山負野隈淮爲圻隱然巨屏端若長城史稱汝南其俗剽輕易發怒地薄寡於積蓄然地在汝墳之間爲周文王化行之地人重信義士尚質文昔汝南風俗最好評隲人物故有月旦里在舊平輿縣之二龍鄉云○志云漢武帝時鄭當時爲汝南太守清身率下卒

之日家無餘財後漢桓帝時宗資為守一郡之政  
 委任功曹范滂資但坐嘯而已唐狄仁傑知豫州  
 時越王兵敗支黨二千人論死仁傑密理申疏詔  
 悉戍邊因出寧州相與哭碑下齋三日乃去宋熙  
 寧間富弼以大學士徙居蔡州留意民事有情必  
 達歐陽脩出守得太原自請易蔡州謝表略云時  
 多喜新奇而臣惟守拙衆方興功利而臣惟循常  
 焉爾輿地紀勝云木鴈堂在州治郡守吳育以之  
 自况也燕譽堂在郡治東園育與劉敞偕和有詩  
 園內有牡丹奇生二亭原父題牡丹詩輕黃金機  
 纓凝碧玉鐫餅時人服其精工奇生亭者取夏侯  
 湛賦石榴奇生之句也○文苑傳桓寬作鹽鐵論  
 應劭撰風俗通蔡玄辯五經同異俱汝南人志謂  
 王粲僑居于此有宅在府城內閭巷口言井云粲  
 所鑿又漢孝子蔡順董永皆嘗居之有二孝莊在  
 城西○金石錄云唐平淮西碑在府城裴晉公廟  
 側昌黎韓愈撰文元和十二年立○唐藝文志路  
 隋平淮西記鄭澥平蔡錄各一卷柳宗元作平淮  
 夷雅一章攷鄭澥所云涼國公者李愬也

汝陽縣附郭

漢縣以汝水爲名水經云汝水出河南天息山流經縣東界入淮水有溱水汶水澠水杭陂港水龍陂港水俱來注之按後周之溱州隋之澠陽縣以溱澠二水名汶水者今謂之汶口也逕城南二十里以至九十里杭陂龍陂二港則在東南二百里內○汶水又東南過平輿縣南平輿漢縣在府城東汝水南舊沈國也有沈亭春秋定四年蔡侯以沈子嘉歸後以爲縣史記秦將李信攻平輿敗之卽此建武三十年世祖封鉞統爲侯國按平輿國初省入後漢陳蕃戴憑許劭皆平輿人○寰宇

記云汝水北有安成故城漢縣武帝封長沙定王子蒼爲侯國王莽之至成也周燕安成人爲郡決曹不寬人獄其後曰嘉曰熒曰浚曰顓曰顓皆燕所傳○宜春故城在縣西南漢縣王莽之宣孱也後漢以豫章有宜春故加北宜春永元三年安帝封后父閻暢爲侯國○富陂漢縣關駟十三州志曰和帝九年分汝陰置多陂塘以溉稻故曰富陂也世祖建武二年王伯封富陂侯于此吳國呂蒙富陂人在今縣界○縣理卽懸瓠城南北史宋元嘉二十七年後魏太武帝率兵攻圍汝南太守陳



憲守拒四十餘日積屍與城齊不拔而退卽此城也注水經云汝水周城形如懸瓠故取名焉魏太和中高祖幸懸瓠平南王肅起層樓於城隅下際水潛降眺粟渚殊爲佳觀故宋書亦云懸瓠爲戎以防郟陂矣按粟渚在城南汝灣有地數頃樹粟其中謂之粟洲酈道元以樹木高茂望若屯雲積氣者也林中有栗堂射埽甚閒敞牧宰英彥多所游嬉黃溪水潏水屈曲流注謂之錦繡溪○鴻郟陂在縣東十里漢書曰汝南舊有鴻郟大陂郡因以饒成帝時關東數水陂溢爲害丞相翟方進以爲決去陂水其地肥美省隄防之費遂奏罷之翟氏旣滅鄉里歸惡言方進請陂下良田不得而奏罷陂王莽時常枯旱郡中追怨方進童謠曰壞陂誰翟子威飯我豆食羹芋魁反乎覆陂當復誰云者兩黃鵠及建武中太守鄧晨使許陽爲都水掾令復鴻郟陂陽曰昔成帝夢上天天帝怒曰何故壞我濯龍池於是乃因高下形勢起塘四百餘里數年乃得立郡亦常稔今廢○縣東南有四望陂後魏豫州刺史王肅于此築城以禦梁戍梁太清年刺史羊鴉仁糧乏乃棄懸瓠而去○葛陂在東

北四十里費長房投杖成龍處也東漢于此置葛  
陂縣旋廢神仙傳壺公以竹杖與費長房投葛陂  
成龍後到東海大旱謂請雨者曰東海神君淫吾  
葛陂夫人故繫之而久旱今當赦令其行雨故縣  
有葛仙公廟唐天寶年置懸壺觀于城北十五里  
後訛爲懸瓠○志云懸瓠池在城北門外唐李愬  
攻吳元濟雪夜擊鴛鳴以亂軍聲卽此俗呼爲鴛  
鳴池愬有廟在城西俗呼白馬將軍廟○城西有  
湖曰西湖舊傳頴許陳蔡接壤之地皆有西湖而  
此爲最著有翠光亭待月臺諸勝宋孔武仲詩亭

下湖光凝不流百尺湖臺蘸春綠相傳以爲佳句  
○漣口在城南界先是裴度築連城于漣口率輕  
騎觀之賊以奇兵自五溝至李光顏力戰却之光  
顏密遣田布伏精騎于溝下扼其歸賊顛危溝壑  
者千餘于是精銳盡殲而李愬得乘虛以入蔡○  
測景臺在城北三里天中山山高丈餘上上下下石  
以在天地之中測日景分數莫正于此○然身臺  
在城東之東射橋保漢汝陽令張熹然身救旱處  
也○漢翟方進墓在縣境內宋劉敞詩持法雖深  
上不疑蕭疎何事觸刑機主恩未改天心改使者

空乘白馬歸○蔡州西北一百餘里古平輿縣界  
 有仙女墓即董仲舒為母追葬衣冠之所傳云董  
 永初居玄山仲舒既長追思其母因築墓焉或云  
 仲舒母是仙女人間無墓恐是仲舒藏神符靈藥  
 及陰陽秘訣於此秦宗權命將卒百餘人往發掘  
 即時注雨六旬不止竟難施工是歲淮西妨農因  
 致大饑○金石錄云漢平輿縣薛君碑文字完好  
 其文曰惟延熹六年春二月平輿令薛君卒烏呼  
 哀哉吏民其咨咨君之德廼建碑于墓石之側其  
 後有銘三百餘言敘述甚詳惟不載其名字世系  
 故莫得而考焉

真陽縣 在府城南  
八十里

漢慎陽縣東魏置義陽郡于此亦梁之白狗堆也  
 魏將堯雄曰白狗梁之北面重鎮梁刺史羊鴉仁  
 攻懸瓠不利退保義陽即此城矣隋開皇年郡廢  
 始置真丘縣唐改真陽以在滇水之陽為名○寰  
 宇記云淮水經縣南去縣八十里西北有滇水流  
 注之酈道元謂之慎水也陂水首受慎水于慎陽  
 故城南陂陂水兩分一水自陂北逕慎陽城四圍  
 城塹上潁川荀淑遇縣人黃叔度于逆旅與語移日

曰子吾師表也范曄論曰黃憲言論風旨無所傳聞然士君子見之者靡不服深遠去疵吝將以道周性全無得而稱乎塹水又自瀆東北流注七陂一水自陂東北流積為同陂陂水又東北結而為窄陂及太陂壁陂諸水又東入汝

上蔡縣 在府城北四十五里

古蔡國史記周武王克殷封叔度於蔡挾武庚作亂周公殺管叔放蔡叔與車七乘其子胡改行率德馴善周公聞之舉胡為魯卿士魯國理言于成王復封胡于蔡是為蔡仲○世本云九江有下蔡

故此稱上按上蔡古城在縣西南十里縣東十里  
有蔡岡周迴五十里中有八卦臺產蒼草傳曰天下和平王道得而蒼莖長丈其叢生滿百莖下有神龜守之上有雲氣覆之○縣東北有光武臺高十尺相傳漢世祖所築下有光武井○人物考孔子弟子曹秋曹卹漆雕開秦冉又秦李斯漢吳公俱上蔡人吳公史佚其名辟賈誼者洛陽治行第一李斯相秦臨刑歎曰欲牽黃犬入上蔡東門其可得乎按志李斯井在縣南墓在縣西各二里宋劉敞詩二世三公何足論憶牽黃犬出東門天心

忌滿由來事任恃沙丘有舊恩○汝水在縣西五十里朱馬河有二一在縣東一在縣西各去三十里東合戚橋河入于汝有包河在縣東九十里來注之按水經注云汝水又東南過上蔡縣西竹書紀年魏章率師及鄭師伐楚取上蔡者也後漢建安元年安帝封鄧騭為侯國○論語隱義云孔子至蔡解于客舍夜有人盜孔子一隻屐去孔子屐長一尺四寸與凡人屐異○東觀漢記羅願序曰上蔡任湧文源家舊藏四十三卷後渡江亡去僅存十卷○文獻通考甘棠集一卷上蔡孫僅隣幾

撰咸平元年舉進士第一知制誥其集首篇曰甘棠思循吏也○藥寮叢稿一卷謝景思撰即後學所稱謝上蔡先生

新蔡縣

在府城東五十里

史記蔡叔二子遷于新蔡輿地志云蔡平侯自上蔡徙都于此故曰新蔡王莽之新遷也世祖建武元年封吳漢為侯國○寰宇記云古呂國酈道元謂之中呂昔周穆王時呂侯訓夏贖刑者有大呂亭在縣東○櫟亭左傳魯昭公四年吳子伐楚入櫟註疏楚東鄙邑汝陰新蔡縣東北有櫟亭注水

經曰汝水又東逕標亭春秋之棘標也汝水又東南逕平陵亭又逕陽遂鄉又逕青陂陂東對呂亭

○汝水又逕鮑陽縣故城南應劭曰在鮑水之陽矣鮑音紂故城在今縣西汝水去縣南二里對縣

有葛陵城建武十五年更封銚丹為葛陵侯于此城東北有楚武王塚城北祝社里掘土得銅鼎銘

曰楚武王隧○寰宇記云琥珀丘在縣南三十里鍊丘臺在縣西南五十里上有光武廟○汝南先

賢傳曰新蔡鄭敬字次都為郡功曹都尉太守高懿廳事前有槐樹露下類甘露者椽屬皆以為是

敬賦曰明府之政未能致此但樹汁耳懿不悅乃托疾而去晉書干寶新蔡人撰搜神記若干卷以

示孫綽興公曰卿可謂鬼之董狐○金石錄云漢靈帝建寧三年新蔡長李言上請修復青陂司徒

臣訓尚書臣襲奏可功成于陂塘南樹碑碑稱青陂在縣坤地源起桐柏淮川別流入于潁潁逕新

息坂衍人褒信界灌田五百餘頃

西平縣 在府城西北百三十里

古荀子國漢置縣曰西平烈士傳曰西平縣有龍

泉水可以淬刀劍蘇秦說韓王曰韓有劍戟出于

棠谿今縣西界有棠谿村○寰宇記云故西平城在縣西七十里有三十四陂魏典農鄧艾所造也九頂山歟樹山諸石山俱在縣西南一百里○後漢書戴封爲西平令時早禱視無應封積薪坐其上以自焚火起而雨降遠近稱服一統志元李不作和元恕俱西平尹以禮讓教民不事鞭撻民皆化之○漢郅憚西平人爲上東門候拒武帝不納今東門外有憚墓○晉和嶠西平人庾頌稱其有棟梁之用

確山縣

在西南五十里

漢安昌縣張禹所封之邑亦曹魏義陽郡治也東漢改曰朗山以縣南四十里朗山爲名山下有朗陵世祖建武中封城陽校尉臧宮爲侯國晉何曾爲朗陵公卽此宋改確山以縣南十四里確山爲名世傳何曾見此山有日杵自動有聲取之不出又謂之浮石嶺注水經曰湊水出浮石嶺北青衣山亦謂之青衣水矣○志云蟠山在縣南二里蟠繞城郭其狀若龍秀山在西北十里飛烟積翠視諸山爲秀出金頂山在縣西四十里頂上雲霧多緋紫色望若金光樂山在西北四十里卽朗山也

宋避諱改今名山麓有唐李愬平蔡時軍營石壘  
蓋愬以兵絕朗山道夜行七十里至蔡處山頂有  
池名皓月池生四季蓮花黃酉湖發源于此東流  
合斷際練家二河入汝水縣南四十五里有沙河  
一名吳寨河東自桐柏縣來者合三里河入汝○  
北泉在縣西北樂秀二山之間泉水湧作蓮花狀  
宋曹庠魏著夏侯冲賀瑱結茅隱居于此○城塚  
記云故道城在縣西南卽春秋道國所謂江黃道  
柏是也在汝南安陽界○高皇臺在縣東南四十  
里漢高帝所築又一舍有四望城後魏王肅築

遂平縣

在府城西  
九十里

漢吳房縣孟康曰本房子國吳王闔閭弟夫槩奔  
楚封棠谿氏于此故曰吳房矣唐元和年以吳元  
濟叛改遂平○志云洪山在縣西六十里又八里  
爲奧來山又二里爲渣呀山一名嗟峨山其山空  
有洞穴可深入唐節度使李觀及吳元濟戰渣呀  
山五代黃巢由潁蔡保渣呀山皆謂此也○石羊  
河出縣西平頭塚山卽奧來山之右東流入汝水  
又舍許有上渠溝源出渣呀山合陽奉溝入沙河

信陽州

在府城南三  
百七十里領縣一



汝寧府志卷之十一  
周中伯所封後周武帝立中州州治內柔惠咸喜  
二堂取毛詩云柔惠且直周邦咸喜之義也卽漢  
平氏縣之義陽鄉地魏黃初中立義陽郡縣于此  
郡治安昌而縣治石城矣宋廢郡爲義陽軍尋改  
曰信陽范純仁劉安世盧士宏皆治信陽軍○前  
賢詩云羣山關設險高屋照多陰晴嵐度丘壑踈  
翠上衣襟今環翠堂沿其名又有三秀堂在東城  
隅舊名牧牛軒宋宣和間以杏樹產芝被旨易今  
名相傳神宗元符時忽有道人書於司天橋上曰  
日坐竹馬橋夜宿牧牛軒○注水經云淮水又逕

義陽縣故城南其城圓而不方世謂之白茅城  
對固成山山有水注流數丈洪濤灌山遂成巨井  
謂之石泉水北流注于淮○寰宇記云淮水西自  
桐柏縣界流入有明河三灣河九曲河俱合瀨水  
注之按州西北百二十里之天目山下有白龍潭  
卽明河之源也三灣河源出州南五十里南山下  
九曲河出州南九十里之鷄頭山其水曰鷄頭水  
凡九渡郭虎詩云春來芳草滿鷄頭又云春風九  
曲河邊路者也水經注謂九渡水出鷄翅山礮澗  
縈委沿溯九迴溪之東又有一水發自山椒下數

丈縈湍直注頽波委壑可數百丈望之若霏幅練  
焉下注九渡水又北流注于淮淮水又東得澗子  
口○寰宇記云澗水南自隨州界流入注水經以  
澗子一帶三川亂流北注經賢首山西是也按澗  
水至州城南入江濤流甚激前人詩城邊澗水抱  
城流卽此○賢首山在州西南七里南北史魏攻  
義陽齊蕭衍救之上賢首山者也亦名賢隱山蔡  
道恭詩開來欣夙夕結駟快茲游木落川原淨鳥  
鳴烟霧收狂尋危處上倦向輿中休爲解登山理  
穿雲望故丘又落落垂衫袖脩脩著羽翰初當半

嶺坐兼得衆峰看幽閔陰常暝龍葱氣不寒更窮  
巢鵲處只恐下來難○志云士雅山在州南六里  
梁天監時魏將元英所築壘也震雷山在東南二  
十里山多澗谷樹木幽翳懸瀑亂流如雷震吼故  
名又五十里爲靈山視衆山爲特高每有雲氣覆  
頂卽雨其下有白馬常出入洞中人逐之不見○  
卓谷山在州北五十里以形似卓谷而名上有寺  
下有潭○金山在州南五十里連環二十餘里通  
鑑魏將辛祥夜襲梁將胡武成於金山進攻義陽  
曹景宗鑿峴以救之今有曹城在州南三十里又

三十里有峴山與州東之義陽山相望故昔人云  
依武山以立義陽郡也按武陽黃峴二關用山爲  
障不設濠隍一曰冥阨一曰平靖關史記魏攻冥  
阨淮南子曰天下九塞冥阨其一也平靖關見十  
六國春秋有大小石城鑿山通道昔義陽縣設立  
於此水經注云石城山南有天井濶數百步在州  
東南九十里○志云鍾武廢縣在州西南漢置屬  
江夏郡通鑑臧官狗鍾武竹里皆下之卽此○鍾  
山廢縣在州東南本漢鄢縣治屬江夏郡北齊置  
齊安縣及郡隋改曰鍾山縣○蔡母城在州北漢  
志南陽郡有蔡陽縣註云芥之母功顯君邑○武  
城在州東北二十五里昔吳魏之爭有武城蓋由  
楚令尹子常之所治也○曹城已見上其地名曹  
店○淮源城在州西北六十五里北齊置慕化縣  
及淮安郡隋郡廢改縣曰淮源魏文帝發淮浦詩  
發淮浦兮溯黃流鼓船舷兮極浮游雲漠漠兮天  
已秋攬芙蓉兮艤芳舟酌吾酒兮樂無憂懷佳人  
兮結綢繆右見樂府

羅山縣

在州南百四十里

隋置以西南十里羅山爲名漢之鄢縣齊之高安

縣也故高安城在西南一百里蜀漢費禕晉孟嘉  
 皆鄆縣人縣西北有釣魚臺世傳孟嘉垂釣于此  
 ○寰宇記云石人谷在城西三十里谷內有兩石  
 人其狀天成不假人力○竹竿河在東北三十里  
 源出窟壠山北流注于淮又縣南七十五里有澁  
 河水出山石間波流楚澁因以名之同注于淮○  
 子路山在縣西四十五里舊傳子路曾宿于此老  
 君山在縣東百八十里以老子所嘗停車故名縣  
 東南又有仙居山牢山西南有紅山六斗山○  
 有鵲山舊傳羣鵲嘗棲其上每風雨將至則噪以

報山有孟嘉古跡嘉先此縣人見江夏志

光州 在府城東 領縣四

梁大同時置以所屬有光山為名春秋之弦子國  
 也僖公五年楚人滅弦即此故唐武德初置弦州  
 矣杜預曰弦在弋陽軼縣是按弋陽三國魏曾置  
 郡軼即高齊之定城縣也十三州志云定城在古  
 黃子國南十二里寰宇記云黃國故城在州西十  
 二里宋以前光州治定城元省入○輿地紀勝云  
 杏亭在治圃內宋盛度詩弋陽信夷曠深在亂山  
 中惟此仙人杏特著蒼然功○愚閣在州學東南

盛度賦弋陽十詠于此○楚黃歇宅在州治傍楚  
考烈王賜以淮北十二城者金線泉在州城南岸  
宋趙抃詩玉甃常浮灑氣鮮金絲不滴路南泉○  
寰宇記云淮水北去城六十七里有潢水源出黃  
土白沙兩關之間東流至州南抱城而東與淮水  
合又有小黃河白露河俱東自麻城分水嶺來合  
恨溝春河葛溪諸水以入淮唐張佑詩一葉飄然  
下弋陽殘霞昏日樹蒼蒼葛溪漫漶干將劍却是  
猶聲斷客腸○雲坳亭在淮河之側元馬祖常詩  
八月淮南鴈又來雲坳亭畔蕪花開莫言野客渾  
無事臨水閒行日幾迴○志云劉伶墓在州城北  
相傳伶死葬此傍有劉伶井○歸鴈亭在州界故  
滑城內歐陽脩詩長河終歲足悲風亭古臺荒半  
倚空惟有鴈時歸最早柳含微綠杏黏紅石滑州  
城在西北十里光之舊治所也○輿地碑目云新  
浮光志褚孝錫編○唐光州刺史瑜德碑見九域  
志所載今不存○梁大同七年石柱記在州城北  
二十五里普明寺中上有鐫記于酉字上闕一字  
圖經遂改大同七年爲天監七年象之謹按天監  
七年乃是戊子大同七年則爲辛酉當以大同七

年爲是

光山縣

在州城西四十五里

浮光山在縣北八十里一名浮弋山注水經云浮光山卽弋陽山也出名玉及黑石堪爲碁子其山俯映長淮每有光耀縣以此名按卽漢之西陽縣矣西陽故城在縣西二十里晉太康年封汝南王亮子羨爲西陽公又惠帝改封西陽郡王皆此地也永嘉亂後遂廢○志云縣學內有司馬井世傳溫公生時汲此井水浴之公之父巨嘗爲光山令因以爲公名○官渡河在縣南五里源出分水嶺

北流合梅林泊陂張郛等河及蔣港至縣南折流東北入州界達于淮賀守約詩云光山南去有長河兩岬春風漲碧波斜日扁舟重回首向來官橋已無多其上有二龍山一在官渡之東接虎山首入于河一在官渡西接千工堰首入河統在縣南二十里二龍首相向名會龍灘○茹陂水在城東南四十里漢刺史劉馥築以溉田有故城在縣南六十里卽茹由城也顧野王輿地志云茹由城晉安帝所置○按其地有仙居縣本軹縣地漢惠帝封黎朱倉爲軹侯於此劉宋分置樂安縣唐天寶

年改爲仙居以縣有南西二仙山中藏石室仙人所居也杏山在其東北與仙居山隔谷相去七里上有抱朴子煉丹井竈遺跡遍山多杏樹故名寰宇記云仙人廟在南仙居山頂相傳葛玄先時會宰樂安縣人戶饑厄抱朴子濟之以丹至今祀之○水經云谷河水南出鮮金山北流合瑟水入淮俗謂之仙居水淮水又東右壑水注之酈道元以水出白沙東北經柴亭山俗謂之柴水屈曲流百一十里同黃川水入淮按黃川舊光山郡理此其城謂之黃城○迎春山在縣南四十里山色青葱至春彌盛又四十里爲白壓山絕頂有洞洞有古井其山四面向流水縈洄謂之四面山高陌河發源于此流入臨仙河○淨居山在縣西南中有淨居寺蘇子瞻紀遊詩併敘云寺在縣西南四十里大蘇山之南小蘇山之北齊天保僧慧思過此見父老問其姓曰蘇氏久得二山名乃嘆曰吾師告我過三蘇則住遂留結菴而悟道焉世所稱智者大師是也子瞻詩云十載游名山自製山中衣願言畢婚嫁携手老翠微不悟俗緣在失身蹈危機遂恐生死隔永與雲山違徘徊竹溪月空翠搖

烟扉鐘聲自送客出谷猶依依

固始縣

在州城東百十里

漢寢縣續漢書改為固始宋析置期思縣今廢為鎮按期思城在西北七十里漢英布大夫賁赫告反封期思侯者○注水經云縣故蔣國周公之後也春秋文十年楚王田于孟諸期思公復遂為右司馬楚滅之以為縣城西北隅有楚相孫叔敖廟廟前有碑叔敖為楚相死之日詔其子曰楚王封汝必丐寢丘瘠而久安晉太康地志云叔敖祠在期思城西五步歲久隳壞託夢於固始縣令段光

復重修

元馬祖常詩古城猶說漢期思土蝕荒堦

楚相祠丐得寢丘人不奪千年泝水入荒陂○志

云漆井在縣治前俗傳漢高帝追項羽至此以漆

布井使不通河水也金線源在城西南沿而東北

入于淮水○寰宇記云史河在縣東二里決水在

縣東三里澮水在縣西五里曲河水在縣西二十

里泝水在縣西五十里金漿澗水石漕河水在縣

南百五十里俱至城北匯而入于淮按志史河源

出牛山東北流匯于決水漢書云決水出廬州雩

婁縣南大別山北入安封縣又經蓼古城與灌水



合水經注云灌水源出廬江金蘭縣褚先生論神  
龜出于灌水嘉林之中卽此水也寰宇通志俱以  
灌水出縣西四十里之霧露山舊經謂山在雩婁  
之頂語訛爲霧露有大小二灌步俗亦訛爲澮水  
按梁置蓼縣後周置澮州蓋以蓼城及澮水名□  
史河源出牛山陶弘景山圖云牛山出藥草東南  
角有伏石似牛□曲河水出湯坑之梅池寰宇記  
謂之渾全湯去縣南四十五里其湯綠色三月中  
虺毒不可近□水經云泝水出弋陽南嶽山歷陰  
山關北注于淮俗謂之白露水是也□石漕河金

漿澗俱出大蘇山山下有蘇仙市澗水色白如漿  
唐乾封年司馬德順改今名本日淦水○寰宇記  
云安陽山在縣東五十里一名太山山勢高聳上  
有白龍池與霍縣分界○仙井山在縣西五十里  
昔有仙人隱此至今石泉數區畱存○銅井山在  
縣西南八十里山上有井以銅爲口不知起自何  
代亦曰仙人居之又百里爲金剛臺山以雙峰竝  
峙而名山上有風洞龍井禱雨輒應宋嘉熙初嘗  
築石城於山之陽爲光州寓治又百里爲橫溪山  
山腰夾橫水上舊傳唐武后梳粧處相對有照鏡

崖內有胭脂石粉石油石火石其下有沙分爲十八道又百里爲上天山吳真人修道處舊有石洞相傳兵火間因嬾人避難於此洞門自合云○木賊山在縣南百里界山上多木賊草又有白牙山在縣境產桑中弓材○塚記云丁蘭木母塚在縣北六十里之丁村舊謂蘭此地人○唐書王朝與弟審邽審知僖宗間略定閩地安輯有功審知尤英勇號白馬三郎進封閩王時彊藩巨鎮僭號者比比審知有效擯之意部下王延嗣極諫且勸勿受梁僞爵曰義不帝秦此其時也以故審知終身

不失臣節云延嗣光州人葬歸故土

息縣 在州城西 北九十里

春秋息國爲楚所滅納其夫人爲妃終身不言唐王維詩莫以今時寵能忘昔日恩看花滿眼淚不共楚王言○漢書注曰本息縣其後東徙故加新字王莽之新德也光武封馬援爲侯國城北門內有新息長賈彪廟彪字偉節初下車聞新息人例不養子彪嚴其制數年之內生息繁衍僉曰賈父所長養也人思其德爲立祠焉城西南又有魏汝南太守程堯碑太和年立唐劉長卿新息道中蕭

汝寧府志卷之五  
條獨向汝南行客路多逢漢騎營古木蒼蒼離亂  
後幾家同住一孤城○寰宇記云淮水自西流入  
經縣南去縣五里汝水自西流入經縣北去縣八  
十里又二十里爲營河卽汝之支流也東南流入  
淮又縣東有泥河源出萬安塘谷河源出堅斧堰  
閭河源出高黃坡俱流入淮○志云白公城在縣  
東北楚太子建子也舊有白公廟謂之白亭屬褒  
信縣元省入陽安故城在西南四十里春秋江國  
地也漢置陽安縣于此○古息城在縣北三十里  
息侯廟在西南十里有珉玉坑去息侯廟東南五  
里玉色潔白隋唐遣官採取後爲淮水所沒開元  
中淮徙復出其玉溫潤倍勝昔時○翫花樓在縣  
學西北舊傳息侯所築以淮海集攷之蓋光州藏  
春塢也○玉梁渠在西北五十里隋仁壽中修築  
唐開元縣令薛務更加疏導管陂六十所利田三  
十餘頃

商城縣

在州北  
一百里

劉宋州郡志云春秋黃國也元嘉年僑立苞信縣  
于此後成實土按梁以項城縣爲殷城鎮處流人  
是矣隋文帝以豫州重有苞信之名改爲殷城縣

至煬帝又立義州于此唐貞觀年州廢縣存宋改  
今名尋省人固始 國朝成化復置○志云車轂  
山在縣北二十里銅井山在東北四十里又三十  
里爲青山一名峽口山○果老崖在縣西南四十  
五里舊傳仙人張果所居又東南百五十里有老  
鸛崖以形似而名○溫泉在縣南三十里能已癆  
疾又西南七十里有五關河一曰白沙二曰土門  
三曰斗水四曰黃土嶺五曰修善嶺凡五關源自  
考溪十八道河旋轉紆迴五水相合于此

汝州

隸河南南  
布政司領縣四

隋置汝州以汝水爲名唐天寶間改臨汝郡尋復  
舊春秋戎蠻子邑有蠻中聚在州西南界漢河南  
郡之梁縣地也十三州志云梁周南鄙邑秦滅東  
周遷其君於此謂之陽人聚在今州西戰國時謂  
之南梁以別于大梁也 國初以梁縣省入州○  
梁縣舊理在汝水南俗謂之治城隔汝水與注城  
相對司馬彪曰梁縣有注城史記魏文侯三十二  
年敗秦于注卽此注城南面已爲汝水所壞後魏  
於此立治城縣隋大業改承休以漢有承休城云

東觀漢記光武封姬常爲承休公用王周祀元始二年更曰鄭公王莽之嘉莢也汝水又東爲周公渡藉承休之徽號有周公之嘉稱矣○注水經云汝水在河南梁縣勉鄉西天息山地志曰出高陵山卽猛山也汝水于朗臯山東出峽謂之汝阨卽放臯山也一名狼臯山又名鳴臯○唐貞觀中所建清暑宮在州西南六十里崆峒山側崆峒山者黃帝問道廣成子之所也開元年汝州刺史盧貞碑略引爾雅云北戴斗極爲崆峒其地絕遠華夏之君所不至禹跡之內山名崆峒者有三焉其一在臨洮秦築長城之所起也其一在安定二山

高大可取財用彼人亦各於其處爲廣成子立廟而莊生述黃帝問道崆峒遂言遊襄城登具茨訪大隗皆與此山接壤則臨洮安定非問道之所明矣仙經敘六六洞天五嶽不在其列是知靈跡所存不繫山之大小也此山之下有洞焉其戶上出者舊相傳云洞中白犬往往外遊故號山冢爲玉狗峰昔之守宰以爲神居閔潔懼樵牧者褻弄因積土封之今升踐其頂響連于下甚深遠矣又有溫水數源揚波於川左泉上華宇連蔭芙蓉交拒

方塘石沼錯落其間頤道之士多歸之其水東南流注廣成澤水按志廣成澤在州西四十里唐聖曆三年正月則天駕幸尚有碑石斷折口後漢書安帝永初元年以廣成爲遊獵地假與貧人二年鄧太后臨朝鄧騭兄弟輔政以爲文德可興武功可廢請寢蒐狩之禮于時馬融作廣成頌諷云大漢之初基也揆厥靈囿營於南郊右轡三塗左概嵩嶽面據衡陰箕背王屋浸以波濞演以滎洛金山石林殷起乎其中神泉側出丹水湟池惟石浮磬耀焜於其陂是此澤也隋大業中置馬牧焉亦

名黃陂酈道元所云汝水又東黃水注之者矣○

黃水東南逕白茅臺東又南逕梁瞿鄉西漢書世

祖自潁川往梁瞿鄉馮異先詣行所者括地志云

一名梁雀塢在汝州梁縣東北二十六里或以爲

卽承休城○城塚記云魏陵在州城東大龍山巔

魏元氏所葬戰國時此地屬韓後屬魏也其下有

龍興寺祀顏真卿宋李廌詩古寺今如昔泉高夜

不晨○風穴山在東北二十里唐時貞禪師傳燈

之所宋吳幾復隱此舊有吳公洞讀書菴雅才亭

諸勝李廌俱題詠其上有翠嵐亭登之則州城可

見知州彭綱詩翫月臺前春水流翠嵐亭上偶乘  
遊日斜酒散僧鐘定野鳥一聲山寺幽○霍山在  
東南二十里左傳哀四年楚爲一昔之期襲梁及  
霍是也漢立霍陽縣以此有故城俗謂之張侯城  
又三十里爲魚齒山襄十八年楚伐鄭次于魚陵  
涉于魚齒之下涉水出焉○鹿臺山在州北二十  
里狀如蹲鹿故名又二十里爲重金山山多黃石  
層纍相成日夕掩映山色如金○金石錄云汝帖  
在州治內凡十二刻未曾改摹此君堂在郡廳宋  
元祐年知州文大方構莊公岳系之以詩○致雨  
亭在州治北圍跨西池上宋咸平中趙况爲守時  
建刻蘇轍祈雨文於石○香遠亭在州治後園有  
荼蘼三株宋時物金大定中知州烏古倫取蘇軾  
無風香自遠之句命名因爲作記○樂山亭在州  
城西北宋端明學士韋處厚築有古碑○思賢亭  
虛舟亭俱在治後宋祥符間楊億知州事有賢名  
後王珣瑜來作守思之因作思賢亭劉攽有記虛  
舟亭者金興定初防禦使完顏建趙思文立碑○  
唐杜甫送賈閣老出知汝州西掖梧桐樹空留一  
院陰艱難歸故里去住損春心宮殿青門隔雲山

紫邏深人生五馬貴莫受二毛侵按唐書肅宗二  
年九節度師潰于鄴城汝州刺史賈至奔襄鄧而  
史闕書卽此時也○孟郊夜集汝州聽陸僧辯彈  
琴要樂寵詞客清宵意無窮徵文北山外借月南  
樓中千里愁併盡一樽歡暫同胡爲憂楚瑟漸瀝  
起寒風○志云巢父井在城西郭門其傍有巢由  
廟宋宗舜臣刻王通叟吊巢父文于石又有紹聖  
四年赤城羅適題巢父亭詩泊然巢一枝常靜不  
待息天地存遺井聊以見清德弘治間水漲西河  
浮出○馬跑泉在州城東南相傳漢光武軍敗之  
水忽馬跑地而得此泉又龍泉在城西南其水鑿  
繫中秋之夕陰雲蔽月俯觀泉內魄形自若前人  
詩我欲龍泉觀夜月崆峒烟雨阻人行有石龍湫  
在其側四壁千仞散泉如雨唐孟郊有觀龍湫詩  
卽此○城西門外有洗耳河源出登封縣之箕山  
相傳許由避堯洗耳于此南流入汝汝河在城南  
五里源出天息山西自伊陽界來州東三十里黃  
澗河注之一名趙落河源出左村北元張政汝河  
詩湛湛清風九曲灣灑沈徹底似拖藍扁舟一葉  
無人繫風動橫移向碧灣○碑目云唐令狐緒刺



汝州有善政汝人請刻石頌德緒以弟絢當國固讓宣宗嘉其意乃止宋楊億以翰林出知汝州士民得其片文隻字以爲至寶王素亦以翰林出守遇事立決濬有湖陂人目之爲太史湖熙寧初富弼因爭新法謫汝州判魏瀨罷邑以親老求近鄉局得監汝州鹽稅久之以宗正丞召命下及門而卒○紫薇詩話云紹聖初蘇子由罷門下侍郎知汝州吳傳正當制行詞曰薄責尚期改過原情本出愛君尚存忠厚之意如此○明道雜志云蘇黃門謫汝州因遊天慶觀見殿上壁畫其精問之乃

吳道子筆也而殿稍不完因施已俸新之工人於殿春上火珠中見有書字蓋記建殿年月後有書曰某年月日有姓蘇人重修校其時與黃門重修正合然則人之行止豈偶然哉○唐李益上汝州郡樓詩黃昏鼓角似邊州三十年前上此樓今日山川對垂淚傷心不獨爲悲秋王建江陵使至汝州回看巴路在雲間寒食離家麥熟還日暮數峰青似染商人說是汝州山○州西至洛陽縣以臨汝舖爲界去城六十里唐李白離彭婆值雨投臨汝詩投館野花邊羸驂跨不前山橋斷行路溪雨

漲春田樹冷無棲鳥村深起暮烟洛陽山已盡休  
更望伊川

魯山縣

在州南百二十里

魯山在縣東北八十里一名露山以高出羣山之  
表也堯山一名大陌山在魯山西左傳云陶唐氏  
既衰其後有劉累學擾龍以事孔甲龍一雌死潛  
醢以食夏后夏后享之既而使求之懼而遷於魯  
縣因立堯祠于西山焉今亦號大龍山以擾龍見  
稱堯山滄水所出僖三十三年晉陽處父侵蔡楚  
子上救之與晉師夾泝而軍註䟽泝水魯陽縣東

也後漢書光武破王尋於昆陽士卒塞於滄水之  
上又名燒車水以光武燒王尋輜重於水濱矣○

注水經云溫泉水出縣北山阜七泉竒發炎熱竒  
毒疴疾之徒無能澡其衝漂救癢者咸去湯十許  
步別池然後可入湯側有石銘曰皇女湯可治萬  
病亦可熟木又有波水卽馬融廣成頌浸以波差  
者也○城塚記云魯陽公墓在露山東北五里去  
縣二十五里墓上石碑有魯陽公墓四字淮南子  
云魯陽公與韓師戰酣日暮援戈而撝之日爲之  
反三合漢因立魯陽關于此關上有水俗名三鴉

水後周於此置三鴉鎮亦曰平臯城去縣西南十九里高齊又移於縣東北十七里改爲魯城其實二城與關相表裏□三鴉鎮北有較轡橋世傳漢光武帝爲王莽兵所迫至此乃先渡橋及莽至則橋已沈矣後人掘見石獸石柱于此○寰宇記云犍縣故城在縣東南屬南陽郡漢地里志南陽領犍等三十六縣是也繞角城亦在東南春秋成六年晉師遇於繞角者應城在縣界左氏邾晉應韓武之穆也注應國在襄城父城縣西南韓詩外傳周成王與弟戲以桐葉爲珪曰以封汝周公曰天子無戲言王應時而對曰應侯今應城固此地矣○志云彭山在縣東南二十里世傳彭越屯兵于此○黑山在縣南二十五里又縣北三十里有明山相傳漢光武所經日暮昏黑尋改北徙復驚明朗也扶安山在縣東南五十里上有唐秦王廟昔時駐馬于此又縣北四十里有青條嶺陂泉原上唐元結墓在焉顏真卿銘舊傳結嘗隱商餘山去州東南十五里○縣西八十里有歇馬嶺遙望伏牛山秀出孤峰石窗閃倏靈異周日又十里爲吳大嶺沙河所出東流會于澧水○清水河在縣東

二十里發源赤城村東流入沙河赤城相傳劉聚屯兵所築其址尚存又縣西三十里之當齊河發源焦山北流至竹岭村縣南五十里之秋河發源楊家林流經寶豐縣界俱入沙河○括地志云琴臺在縣子城東南廣二百步唐開元中元德秀爲令彈琴其上顏真卿作碑文又有修禊亭相傳歐陽詹爲令以三月三日集僚吏修禊焉○後魏景明中酈道元與弟道約俱守魯陽爲政清靜表立黌序邦人化之按道元卽注水經者其注汝水曰余以永平中蒙除魯陽太守會上臺下列山川圖

以方志參差遂令尋其源流此等雖非學徒難以取悉然旣在邁見不容不述今汝水西出魯陽縣之大孟山黃柏谷巖鄣深高山峭邃密石徑崎嶇八跡裁交西卽盧氏界矣其水東北流逕太和城四又東流逕其城北左右溪松列植筠柏交蔭尹公度之所棲神也又東屈堯山西嶺下水流兩分一水東逕堯山南爲湫水卽經所言湫水出堯山矣一水東北出爲汝水歷蒙柏谷左右岫壑爭深山阜競高夾水層松茂柏傾山蔭渚其水津流不已北歷長白沙口狐白谿水注之夾岸沙漲若雪

因以取名其水南出狐白川北流注汝水又東北  
趣狼臯山者也唐劉長卿魯山送別淒淒遊子若  
飄蓬明月清樽祇暫同南望千山如黛色愁君客  
路在其中

郟城縣

在州東  
九十里

左傳昭十九年楚令尹子瑕城郟孫昭子曰楚不  
在諸侯其僅自完也志云郟府臺在縣東北二十  
五里○注水經曰汝水又東南逕郟縣故城南激  
水注之汝水又左合藍水逕紀氏城西有增臺記  
謂之紀氏臺續漢書曰世祖車駕西征盜賊羣起

郟令馮魴爲賊延哀所攻力屈上請紀氏羣賊自  
降在郟城東北十餘里二臧宮郟人從光武征戰  
有功拜輔威將軍○郡國志云鈞臺在縣西相傳  
黃帝問道廣成駐蹕於此大奏鈞天之樂故名○  
神龜臺隋開皇初獲一神龜腹文曰天下揚興左  
有尹字右有月字又有望仙臺建于望仙村者俱  
在縣西○大劉山在縣北三十里世傳漢高祖入  
關駐此名沛公壘注水經以扈澗水出大劉山又  
以董溝水出沛公壘是也東漢光武亦駐焉後人  
立廟山上有大劉小劉之異○峨眉山在西北三

十五里以類蜀之峨嵋故名蘇文忠所命也其地與扈陽山相近山之陽有婁景洞世傳婁景隱此亦滄澗溪水所出矣山下有廣慶寺寺內有三蘇祠軾轍兄弟俱葬此山宋苑中詩天涯流落兩丘土玉樹竝掩佳城中舉杯一酌不忍去萬木颯颯秋聲空又五里爲鳳翅山以形似鳳翅而名上有靈泉○紫雲山在縣東南六十里山頂常有雲氣舒布作紫翠之色其陰有白虎潭世傳周處射殺白額虎處又縣東三十里之長橋河卽周處斬蛟處也水流入汝○黃伯陽洞在縣之封家莊世傳

伯陽隱此因名○婆娑園在縣西相傳崔鷄所居又名石牛莊鷄詩云晚禽噪竹百千翅殘菊橫枝三兩花好在山園養衰疾風波不到野人家

寶豐縣

在州東南八十里

唐證聖中分邾城東南地置武興縣神龍元年改爲龍興宋易今名以縣舊有冶鑄場云○志云寶豐故城在今縣東元省人梁縣者國初梁縣省復置今縣因移治所又縣西北有父城左傳昭十九年楚城父城卽此地也今名父城保保內有柵鼓臺相傳漢高祖與項羽戰柵鼓于此○寰宇記

云汝水在縣南二里縣東坊有湖濶二十里即汝水所溢唐楊汝士居之因名楊家湖○歇馬山在東南六十里相傳漢高祖歇馬處史記高帝敗項羽于九里山在今縣東三十里香山之前香山舊名火珠山大悲菩薩證道所也唐時寺塔尚存塔後有天地池架石梁諸勝白居易詩六月灘聲如猛雨香山樓北暢師房夜深起凭闌干立滿耳潏潏滿面涼○三堆山在縣西三十里相傳白樂天結廬于此又五十里為五塌山五峰疊翠儼若屏風故名○縣東有青條嶺四面分水其一曰淨陽河流合澧水又北為馬渡河西為綿封河東北為達老河俱流合于沙河○塚廟記云膠東侯廟在城西北隅祀漢賈復也有賈復城擊郟時所築注水經云柏水經賈復城北一名通鴉○甘羅臺在縣西北世傳秦相甘羅與楚會盟于此○宋寇瑊墓在縣東南石渠保俗訛為萊公墓

伊陽縣 在州西五十里


春秋僖二十二年秦晉遷陸渾之戎置伊川註疏伊川周地伊水也兩漢因之唐置伊州陸渾隸焉尋改伊陽○十三州志云伊陽有甘泉山中有泉

水亦按在今縣北五里又有雲夢山鬼谷子修道處其北有水日洞下注如垂簾名水簾洞按在縣東南七里又三里爲紫羅山縣東北十里練溪山其上有練溪寺又縣西二十里有天息山汝水出焉又西北二十里有九臯山昔有鶴鳴其上故名又縣南四十里有現山山上有乾明寺唐文皇經此喜其危峰獨見因勅茲號○窄口在縣南八里其水北出入汝又縣東十里有紫羅口昔禹所鑿汝水東出者也伊水發源熊耳山經縣境入洛陽○唐皇甫冉早渡伊川見舊作昆鷄鳴曙霜秋

水寒旅涉漁人昔隣舍相見具舟楫出浦興未盡向山心更愜林落通白雲茅茨隱紅葉東臯滿時稼歸客欣復業李德裕伊川晚望桑葉初黃梨葉紅伊川落日盡無風漢儲何假終南客角里先生在谷中劉長卿送李少府君家南郭白雲連正待情人弄石泉月照烟花迷客路蒼蒼何處是伊川○明伊陽廣文何東魯先師遺像石刻識云嘉靖壬子歲九月二十二日得夫子像於趙氏頽軸敗楮飛塵濺水蒙密闔然取潔幕拂而視之乃景陵簿靳氏所言煙驛梁有執政者乘而過馬嘶伏策



汝南志勝  
卷之九  
十一  
之亦。通索諸橋下。刻乃唐吳道子筆也。今  
監于學堂



書